

08.09.2023 11:41



ՀՀ փաստաբանների պալատի փաստաբանների իրավունքների պաշտպանության հանձնաժողովը 29.08.2023թ-ին քննարկել է փաստաբան Լուսինե Վիրաբյանի ներկայացրած հաղորդումը՝ իր մասնագիտական գործունեության իրականացման շրջանակներում տված իրավական խորհրդատվության հետևանքով փաստացի հետապնդման, ներառյալ՝ իր դրամական միջոցների վրա արգելանք դնելու վերաբերյալ:

Փաստաբանը, մասնավորապես, հայտնել է, որ քաղաքացիական գործով հանդիսացել է հայցվորի ներկայացուցիչը: 2023թ. ապրիլի 25-ին Երևան քաղաքի առաջին ատյանի ընդհանուր իրավասության քաղաքացիական դատարանը նշված գործով հայցը բավարարել է, և վճիռը մտել է օրինական ուժի մեջ: Պատասխանողի կողմից վճիռը չկատարելու հանգամանքով պայմանավորված՝ փաստաբանը դիմել է վճռի հարկադիր կատարման, սակայն տևական ժամանակ հնարավոր չի եղել կատարել դատական ակտը, ինչի պատճառը՝ ըստ փաստաբանի, հանդիսացել է պարտապանի վարքագիծը:

Նշվածի վերաբերյալ փաստաբանն իրավական խորհրդատվություն է տրամադրել իր վստահորդին՝ մեկնաբանելով օրենքը և պարզաբանելով, որ դատական ակտը չկատարելը կամ դրա կատարմանը խոչընդոտելը կարող է հանգեցնել քրեական պատասխանատվության, ինչն էլ սոցիալական ցանցի իր էջում հրապարակել է վստահորդը՝ հղում կատարելով փաստաբանի խոսքին:

Նշված հրապարակման հիմքով փաստաբանի և իր վստահորդի դեմ դատարան հայց ներկայացվել է՝ պատվին ու արժանապատվությանը պատճառված վնասի հատուցման պահանջով: Միաժամանակ որպես հայցի ապահովման միջոց հայցվորը պահանջել է 6 միլիոն դրամի արգելանք դնել **փաստաբանի գույքի** և դրամական միջոցների վրա: Հայցի ապահովման միջոց կիրառելու վերաբերյալ նշված միջնորդությունը դատարանի կողմից բավարարվել է, և արգելանք է դրվել **փաստաբանի դրամական միջոցների վրա**, որի հետևանքով վերջինս չի կարողանում պատշաճ կատարել իր մասնագիտական պարտականությունները, իր մյուս վստահորդներին փաստաբանական ծառայություններ մատուցելիս կատարել անհրաժեշտ պետական և այլ վճարումներ:

Փաստաբան Լուսինե Վիրաբյանի դիմումը
Հանձնաժողովը քննարկել է փաստաբանի
անկախության և օրինական մասնագիտական
գործունեության շրջանակներում գործողությունների
ազատության համատեքստում:

Հանձնաժողովը հիշեցնում է, որ փաստաբանի
գործունեության օրենսդրորեն ամրագրված
առանցքային երաշխիքներից է նրա անկախությունը
մասնագիտական գործունեության մեջ: Փաստաբանի
անկախությունն անհրաժեշտ պայման է անձանց
համար որակյալ իրավաբանական օգնություն
երաշխավորելու և ըստ այդմ՝ Սահմանադրությամբ
ամրագրված իրավունքների պաշտպանությունը
գործնականում ապահովելու հարցում: Օրենքով
ամրագրված է, որ իր մասնագիտական
գործունեության մեջ փաստաբանը լիազորված և
նույնիսկ պարտավոր է առավելագույնն անել
օրենքով չարգելված բոլոր միջոցներով և
եղանակներով իրավաբանական օգնություն ստացող
անձի իրավունքների, ազատությունների և շահերի
պաշտպանության համար:

Այս առումով Հանձնաժողովը **խիստ մտահոգված** է
Լուսինե Վիրաբյանի դիմումում, ինչպես նաև նրա
դեմ ներկայացված հայցադիմումում արտացոլված
տեղեկությունների առնչությամբ, որ վերջինս
քաղաքացիաիրավական գործիքակազմով
հետապնդման է ենթարկվում բացառապես իր
օրինական մասնագիտական գործունեության
շրջանակներում իրականացրած գործողությունների
համար:

Հանձնաժողովը վերահաստատում է՝ փաստաբանը
չի կարող ենթարկվել որևէ հետապնդման, անկախ
դրա բնույթից, իր մասնագիտական
գործունեությունն իրականացնելու համար: Այդպիսի
գործողությունները կաշկանդող նշանակություն են
ունենում փաստաբանի օրինական մասնագիտական
գործունեության հարցում և սառեցնող էֆեկտ ունեն:
Դրանք խաթարում են մարդու իրավունքների
պաշտպանության ամբողջ համակարգը և
բացարձակապես անընդունելի են:

Անդրադառնալով փաստաբանի նկատմամբ
կիրառված հայցի ապահովման միջոցներին, այդ
թվում՝ դրամական միջոցների վրա դրված
արգելանքին՝

1. Անհրաժեշտ է ընդգծել, որ փաստաբանի
մասնագիտության առանձնահատկությունների
հաշվառմամբ՝ պետական մարմիններն իրենց
իրավասության սահմաններում գործողություններ

նախաձեռնելիս կամ որոշումներ կայացնելիս պետք է հատուկ քննարկման առարկա դարձնեն դրանց հնարավոր բացասական հետևանքները փաստաբանի՝ մասնագիտական գործունեության նկատմամբ: Փաստաբանի նկատմամբ հայցի ապահովման միջոց կիրառելու հարցը քննարկելիս պետք է ուշադրության կենտրոնում ունենալ նաև նրա մյուս վստահորդների իրավունքների պաշտպանության հարցերը, քանզի նման միջոցի կիրառումը հանգեցնելու է փաստաբանական գործունեության սահմանափակման:

Ընդ որում, եթե նույնիսկ փաստաբանի գործունեությունը դիտարկենք բացառապես տնտեսական գործունեության տեսանկյունից, ապա ՀՀ քաղաքացիական դատավարությունն արգելում է կիրառել հայցի ապահովման միջոց, եթե այն կհանգեցնի գործունեության իրականացման փաստացի անհնարինության կամ այդ գործունեության համար կստեղծի էական խոչընդոտներ:

2. Միևնույն ժամանակ, կարևոր է, որ պետական մարմիններն առաջնորդվեն փաստաբանի բարձր իրավագիտակցության և բարեխիղճ գործելակերպի կանխավարկածով: Տվյալ դեպքում՝ փաստաբանի գույքի վրա արգելանք կիրառելիս պետք է լինեն առավել ծանրակշիռ փաստարկներ:
3. Հարցը պետք է դիտարկել նաև փաստաբանի դերի և մասնագիտության հեղինակության համատեքստում: Փաստաբանի հեղինակությանը չվնասելու հարցում: Առանձնակի հոգատարությունն այս հարցում անհրաժեշտ պայման է անձանց իրավունքների պաշտպանվածության պատշաճ միջավայր ապահովելու համար: Հասարակության մեջ փաստաբանի դերը նկատի ունենալով՝ նրա կարգավիճակին առնչվող հարաբերություններից բխող վեճերով հայցի ապահովման միջոց կիրառելը, պետք է լինի ծայրահեղ միջոց:

Ամփոփելով վերոգրյալը՝ Հանձնաժողովը՝

խիստ մտահոգություն է հայտնում Լուսինե Վիրաբյանի մասնագիտական գործունեության սահմանափակման հանգեցնող կիրառված արգելանքի իրավաչափության կապակցությամբ,

հետևաբար, չմիջամտելով իրականացվող դատական գործընթացին, **ուշադրության կենտրոնում է**

պահելու խնդրի առարկա գործի ընթացքը:

**ՀՀ ՓԱՍՏԱԲԱՆՆԵՐԻ ՊԱԼԱՏԻ ՓԱՍՏԱԲԱՆՆԵՐԻ
ԻՐԱՎՈՒՆՔՆԵՐԻ ՊԱՇՏՊԱՆՈՒԹՅԱՆ
ՀԱՆՁՆԱԺՈՂՈՎ**

```
Վերադառնալ $(window).load(function(){ if(typeof $(".fb_comments_count").html() != "undefined" &&  
parseInt($(".fb_comments_count").html()) != 0){ updateCommentsCount(window.location.href); } })
```